

# Jü Carta San Perota Bat Huëpo Jiojtekähui

## *Teboteri*

**1** <sup>1</sup>Ínapo jü Peero Jesucristota apóstol huame bem buiärapo bittuarimmeune tebote, jume Pontopo, Galaciapo, Capadociapo, Ásiapo, éntok Bitiniapo chíbejtillammehui. <sup>2</sup>Eme jume bannaataka Dios Áchayta täyäu yeu púari, Espíritu Santoy tü tátabri, juka Dios nésauta enchim yáanakë béchïbo, alë bénasi Jesucristota ojboy enchim jíapsi tütetunakë béchïbo. Tühua éntok yánti jíapsihuame buéresi enchimmeu ayunake.

## *Tua lútüría boobit-huame*

<sup>3</sup>Tua yörisi maachi itom Señor Jesucristota Dios Átchay, áapo itom bemela yoremsi yáuhuak, buéresi itom ä jiokolekä béchïbo, yü jíapsihuamta tua itom boobitnakë béchïbo, Jesucristota kókkolam násuk jíabitekä béchïbo, <sup>4</sup>átteata itom mabetnakë béchïbo, kaa momoyemta, kaa nanasontemta, éntok kaa mumukemta áman téhuekapo ériata enchim béchïbo, <sup>5</sup>Diostat enchim át eä béchïbo, Áapo ä

úttiäray enchim suaya, enchim ä jájamnakë béchïbo juka yore jínëhuamta hua taahuari äbo huémstat yeu machinakemta.

<sup>6</sup>Íari béchïbo eme al-leiya, éläposu én kaa jaiki táapo Diosta ínel éai kaa al-leehuumtem jípunake, enchim at eäu jüneria béchïbo, <sup>7</sup>hua orota béppa chë béj-reme. Jáchin huäri ooro luuluuteka júne tájjiai jüneriatunake, alë bénasi jü enchim ä súalëu jüneriasuka tua úttilna, ujoyóriata jípunake éntok yörina hua taahuarit Jesucristota yeu machiayo.

<sup>8</sup>Huä enchim nákëhui kaa ä bil-lataka junne; hua enchim ä súaleka kía én kaa ä bíchaka junne, enchim át al-lee kókköhui, <sup>9</sup>juka enchim at eä béchïbo enchim jípunakëu mabet-lataka, juka jíapsita enchim jínëuriahuamta.

<sup>10</sup>Jume profetam hua Diosta tü eäu enchim bétana näikiarita bétana nokakame, ä jüneriaka tüüsim át suaka nátemajek i yore jínëhuamta bétana, <sup>11</sup>tüüsi át nátemajeka jábeta bétana ä nokähui, éntok jita táaposu

Cristota Espiritu ámet aneme ä ayunake tíiya, hua kaita jee hueisu huaka Cristota jikot yáaná bétana nokakame, éntok chúkula huári sáu juka uyjóriata yebijnake tfame. <sup>12</sup>Ímēhui yeu machiak kaa bempörim béchïbo, ál-la ito béchïbom íkái bem nokakāhui én enchimmeu nokhuame huame Espiritu Santota téhueka bétana jípureme bétana; juka Diosta ánglesim bít péāhui.

*Tülisi itom ito nünake  
bétana nokhuame*

<sup>13</sup>Kíalíkem huéchiapo emo nüye, kaa búruk éaka suamsi eaka, éntokem át boobíchaïhui hua Diosta tü eāu enchimmeu nüpanakemta Jesucristota yeu machianakeyo. <sup>14</sup>Jume usiari ára sáyuame bénasi katem huaka juénaraata bannaataka kaita täyaka enchim jo péāu jo báare, <sup>15</sup>ál-la jáchin hua enchim nú nukame santosi áu nüye, eme két alē bénasi símepo santosi emo nünake; <sup>16</sup>bueítuk ínel jïojteri: “Katem chichā machisi jíapsa, bueítuk ínapo Santo.”

<sup>17</sup>Bueítuk Áchaypo eme ä jípurēteko, huaka kaabeta yeu púaka nokta ámet chúpamta hueepulammet bem yári béchïbo, jíbem Diosta májhue ä yöreka emo boojoria síme jume taahuarim ím ániat enchim anēpo tájti. <sup>18</sup>Jünéaka huam kaitapo kía jájana enchim jíapsakāpo enchim jínēutukāhui, juka enchim áchayim bétana enchim mabetakāhui, kaa hua jita momoyemtayi, ooro, ö tómi

tósali, <sup>19</sup>ál-la Cristota ójbo musála machikuyi, hua ili kabarata yúmalataka éntok kaita jita kaa türík jípuremta ójbo bēnakuyi, <sup>20</sup>béja yeu púataka kee jee ániata jünaktehuay naateka, tē ímēi taahuari chúkula huéemmet yeu machiak enchim nákhua béchïbo; <sup>21</sup>éntok áapörík huámem Diosta súale, huaka kókkolam násuk ä jíabitetuakamta éntok uyjóriata ä mik-lata, Diosta enchim súalnakē béchïbo éntok áapörík bétana jita enchim boobinnakē béchïbo.

<sup>22</sup>Jukem Diosta lútúria joaka enchim jíapsi tü tátab-la, jú Espiritu Santota éäpo kaa kía bálit enchim emo náknakē béchïbo, júnentukem emo nákke chíkti enchim jíapsimaki, enchim jíapsi tútti yécharika. <sup>23</sup>Eme júchi bemelasi yeu tómtila, kaa huame áchayriam kókkokame éäpo, ál-la hua kaa nanasontumta éäpo, jú Diosta noki jíápsamtayi, jú jíba béchïbo ayunakeme. <sup>24</sup>Bueítuk:

Síme huaakas kía júya síarita  
bénasi maachi,  
éntok síme hua yoremta  
ujyória júya sehua ténasi  
maachi.

Huä júya huahuake, jú sehua  
éntok huehueche,

<sup>25</sup>tē hua Señorta nooki jíba  
béchïbo ayunake.

Íri éntok ájaria, jú nooki  
evangelioipo huam enchimmeu  
nokhuakame.

**2** <sup>1</sup>Júnentukem síme juēna éerita tójaka, éntok yore bāitattāihumta, ára nókichiata, jábetat jita ínnēhumta, éntok jájana jíaihumta, <sup>2</sup>ili usita júbua

tómtilata chípeä bénasi eme két huame kauhua espiritualim kaa täbui jítamak kuutilam huátianake, iri jü Diosta noki, ámei enchim yótunakë béchïbo Diosta súalhuäpo jínëhuamta tua enchim jájamnakë béchïbo; <sup>3</sup>të béja eme juka Señorta tühuabet jünëelatuko.

### *Jü tétta jíápsame*

<sup>4</sup>Señor Jesucristotahuem rúkte, jü tétta jíápsamta hui, hua lútula huëpo huame yoremem omoutekähui, të Diosta yeu púari éntok áapörík béchïbo béj-reme. <sup>5</sup>Eme két jume tétta jíápsame bénasi emo ériaka emo réutebonake, enchimmea huaka ä kárihua ä yáanakë béchïbo, bueítukem Diosta tékil boojoria béchïbo näikiari, juka jíápsita bétana huémta áapörík Diosta türëu áu enchim huérianakë béchïbo Jesucristota huämi.

<sup>6</sup>Bueítuk júnen két jïojteri:

Juyú, buere joära Sión,  
juka tétata tua nésahuemta  
ejkinampo huémta yétcha,  
huaka yeu púata éntok chë  
musäla machik,  
éntok hua ä súaleme kaa tiusi  
tahuarianake.

<sup>7</sup>Enchim béchïbo, eme ä súaleme, áapo musäla maachi, të huame kaa ä súaleme béchïbo éntok:

Huä tétta jume káarim jojoame  
kaa huáatiakäu,  
iri tua jü tétta nésahueme  
ejkinapo tahuakame.

<sup>8</sup>Éntok:

Huä tétta át tëtítëitihuame,  
éntok hua tétta yore tábeme.

Bueítukim át tëtítëite jü nokichi, bem kaa áma huam jíapsi bárë béchïbo; huári béchïbom két yeu púahuak.

### *Jü Diosta yorembra*

<sup>9</sup>Të eme tua hua génte yeu púari, Diosta yäura tékkil boojoriame, nación tühuata joame, tua lütüriapo Diosta yorembra, huaka kaa machiku enchim aney huam machiria át guómtisi machikun bíchaa enchim núnukamta tühua bétana enchim noknakë béchïbo. <sup>10</sup>Eme huame bannaataka kaa pueblotukaihuim, të enim Diosta yorembra; bannaataka kaa yore nak jiokolihuamta jájamlatukaihui, të én ál-lem ä jájamla, juka yore nak jiokolihuamta.

### *Diosta nésauta joame bénasem emo nüye*

<sup>11</sup>Eme nákhuame, enchimmeune nooka sékána enchim jomemtukä bénasi, éntok enchim boojoä bénasi, huaka juëna éerita enchim tóijnakë béchïbo, huaka tü jíápsita béj-reka huémta, <sup>12</sup>jíba bénasi tülisi emo nüyeka jume kaa Jesucristota súaleme násuku; huam enchim bétana nokhuäpo enchim juëna yórememtukä bénasi Diosta am úttílnakë béchïbo hua Diosta am jiokorë taahuarichi, hua tühua enchim yáaribet suaka.

<sup>13</sup>Señorta béchïbo hua jábe nésahuemta bétukem emo jípure, ä reytuk junne, chë ä nésahuë béchïbo, <sup>14</sup>kífa ä gobernadortuk junne, áapo

äbo am bíttuala, yorememmet nokta am chúpanakë béchïbo, éntok huame tü yöremem bétana tühuata am noknakë béchïbo. <sup>15</sup>Bueituk ïri jü Diosta huáatiähui: juka tühuata joaka jume yoremem kaa susuakame enchim bétana jájana jáme enchim nok páttianakëhui.

<sup>16</sup>Kaabeta mámpo emo jípuremta bénasem emo nüye, të kaa huame íat jáhuiteka juka juënaraata joame bénasi, ál-la huame Diosta néсахui joame bénasi. <sup>17</sup>Simemem yöre. Hermanomem nákke. Diojtem májhue. Rejtem yöre.

*Jü Cristota ejemplo ä jìokot aneepo*

<sup>18</sup>Eme jóapo sáyhuame, enchim tekem bétukem emo jípure, tua am yöreka; kaa huame tü yörememmeu jíbba, ál-la két huame béttek jíapsekammeu junne. <sup>19</sup>Bueituk ínëli anhuame türi Diosta bíchäpo senu én Diosta ä yöre béchïbo kaa al-leetuahuáteko, kaa ä innë éäü júne innëateko. <sup>20</sup>Bueituk jita tühuasa jüri kaa tühuata joaka enchim chónhuähui éntokem, ¿jíba áamak al-leiya? Të eme tühuata joaka jìokot máchiraata bichátek éntokem jíba áamak al-leátek, lútula huëpo ïri türi Diosta bíchäpo. <sup>21</sup>Bueituk fári béchïbem núnuhuak; bueituk Cristo két ito béchïbo jìokot máchiraata bítchak, ejemplota itom mákaka, enchim alë bénasi emo boojorianakë béchïbo. <sup>22</sup>Áapo kaita juënaraata yáuhuak; kaita hua ára nókíchia jíkkajhuak

ä tempo. <sup>23</sup>Áapo juënasi áa bétana nokhuay júne kaa juënasi am yómmiak; jìokot johuaka júne kaa am bé-reka nookak, ál-la huaka áu johuamta hua tua lütüriata joamta mámpo ä tójjak. <sup>24</sup>Áapo hua itom juëna yáarim ä takahuapo núk siika jum kúrusichi, itom hua juënaraata bétana kókkoka tühuapo itom jíapsinakë béchïbo; bueitukem jìokochä yáahuaka béchïbo áma yörela. <sup>25</sup>Bueituk emëe huame kabaram emo näikimtelatukä bénasi aaney, të ënem hua enchim jíapsi suayamtau rúktìla.

*Jume kukunakame éntok  
jùjubekame jáchìn emo nünakëhui*

**3** <sup>1</sup>Júnëli kétchi eme jáamuchim kukunakame, enchim kunam bétukem emo jípure, huame tü nokta kaa súaleme kobatunakë béchïbo kaa nokiayi, të tülisi bem jubim emo nüyëubeyi, <sup>2</sup>tülisi éntok yörisi machisi enchim emo nüyëubet suaka. <sup>3</sup>Huä ujyória enchimmet ayunakeme kaa hua yeutana takahuapo enchim átteanakëhui, hua buéresi ujyória emo chíkhuame, óoro átteahuame, sánko buéresi ujyorisí yáataka átteahuame, <sup>4</sup>ál-la hua huáijhua jíapsita bétana huéeme, hua kaa momoyeme, ïri jü kaa béttek jíapsihuame éntok yánti jíapsihuame; ïari tua chë béj-re Diosta bíchäpo. <sup>5</sup>Bueitukim junëli két tülisi emo nüyey bannaataka huame jáamuchim tü jíapsekame, Diostat éame, bem kukunam bétuk emo jípureka; <sup>6</sup>juka Sarata

Abrahamta “yöreka Señor ti áu ä jijjá bénasi”. Huäri bétana asoarimtakem taahuak, tühuata jóáteko, kaitat ée májhueka.

<sup>7</sup>Eme jujubekame, két áma huamsu, ámemakem aane suamsi emo nüyeka, jünéaka juka jámutta chë kaa útteakamta jíápsékähui, éntok enchim beu juka tühuauta ay jíapsihumamta am átteakähi, Diostau bíchaa enchim buanäu jíkkajitunakë béchïbo.

*Tü éeri tüisi itom ay tahuanakëhui*

<sup>8</sup>Én éntokem simetaka huépülsi jíba éiya, huatem béu jita ínnëaka, emo nákeka emo sailakamta bénasi, emo jiokoleka, éntok kaa emo buérialéka. <sup>9</sup>Juénasi áu ayuhuak kaa juénasi ámeu ayunake, juénasi aihuátek júnne kaa juénasi ä yómmianake, ál-la tühuata jo báanake, jünéaka tühuata átteä iaahuaka enchim núnutukähui. <sup>10</sup>Bueítuk:

Huä al-leaka jíapsi báareme, éntok taahuarim türi bít báareme,

ä nínni yünake kaa juénak ä noknakë béchïbo, éntok ä teni júne kaa ára nókichiata ä noknakë béchïbo;

<sup>11</sup>juénarata tójaka tühuata jonake; yánti náu jíapsihumamta jariunake éntok ä boojorianake.

<sup>12</sup>Bueítuk huame Señorta pusim juka lütüriata joame türeka bitcha, éntok juka bempörim áu buanäu jíkkaja; tee jü Señor huame kaa

tühuata joame kaa türeka am bėj-reka bitcha.

<sup>13</sup>¿Jábesu két kaa tühuata enchim eu yáanake jáni tühuata enchim joayo? <sup>14</sup>Të eme jita jiokot máchiraata bichátek tühuata joaka, úttesem al-leiya. Huä béchïbem kaa emo máujtua bempörim bétana, éntokem kaa naa múksi emo éetua, <sup>15</sup>ál-lem juka Dios Señorta úttile enchim jíápsipo, éntokem jíba huechiapem emo jípureka aane enchim emo nok-ríanakë béchïbo, síme huame tühua enchim boobichäu bétana enchim temájeme yómmia béchïbo kaa buere jíaka éntok yörisi machisi nokaka. <sup>16</sup>Tülisem emo nüye huame jájana enchimmet nokame, enchim juéna yorememtukä bénasi, tiusi tahuanakë béchïbo, Cristota bétana tülisi enchim emo nüyëu jájana jíame. <sup>17</sup>Bueítuk chë türi emé jiokot máchiraata bicháteko tühuata joaka, Diosta ínel ä huáatiayo, kaa tühuata enchim joäpo béppa.

<sup>18</sup>Bueítuk jü Cristo két jiokot máchiraata bitchak séjtul jíbba, itom Dios bejrim béchïbo, hua tü yóreme jume juéna yóremem béchïbo, Diostau itom huéria báreka, lütüriapo jü ä takahua mëhuak, të espíritupo jíba jíápsaka taahuak. <sup>19</sup>Huämi espíritupo két áapo huame bannaataka kókkokame anëu siika. Huanäi ámeu nookak, <sup>20</sup>huame bannaataka ámeu nokta kaa jíkkaj báaremmehui, Diosta bínhua ámet boobíchaïhui junne, huame taahuarim Noéta jíápsayo,



(1<sup>a</sup> de Pedro 3:20)

juka arcata johuayo, huam kaa jaiki géntem, guoj náikim jíba áma jíneihuak, buere baniapo. <sup>21</sup>Jü yore batöhuame hua júnako báata am jínëkä Bénasi, én két yore jínëu Jesucristota jíabitekä béchïbo, kaa huaka takahuapo béppa chïcha máchiraata itot ayukamta itom úhuaaka; ál-la Diostau bíchaa túlisi itom ito nü báreka éenakë béchïbo. <sup>22</sup>Huä téhuekau jikau sikame Diosta báta bétana kátekame; éntokim áapörík bétuk emo jípure jume Diosta ángesim, jume yáuram, éntok jume útteata jípureme.

*Diosta éä paman emo nüyeme*

**4** <sup>1</sup>Juka Cristota ito béchïbo jìokot máchiraata ä takahuapo mabetakä béchïbo, enchimmet két huäri éeri ayunake; bueítuk hua takahuapo

jìokot máchiraata ínnë sukame kaa éntok júchi juënakú annake, <sup>2</sup>huame taahuarim itou bëyeme kaa huaka ím ániapo yoremem kaa huéeläpo ukulëu huáatiaka jíapsi béchïbo, ál-la Diosta éäpo áman itom jíapsinakë béchïbo. <sup>3</sup>Büru táapem béja jume tua Diosta kaa súaleme al-leetua béchïbo jita yáasuk, kaa túrata joaka, kaa huéeläpo juka huakajta bétana huémta ukuleka, nanaakoka, kaa tíura pájkota huëpo rejteka, yü tútti naakoramtaka, huame diosim kaa yöri mátkim yöreka. <sup>4</sup>Ímëi béchïbo át guómtisi maachi hua áme Bénasi kaa huéeläpo juënarata kaa enchim joähui, kíalikum jájana enchimneu jiaahua. <sup>5</sup>Të bempo lütüriata nénkinake hua jíápsammet éntok kókkolammet nokta

chúpanakemta bíchäpo. <sup>6</sup>Bueituk fári béchíbo kët jü tü nooki Diosta bétana huéeme nokhuak jume kókkolammehui, nokta ámet chúpatunakë béchíbo takahuapo aneka bem yáari béchíbo, të jíba espíritupo am jíapsinakë béchíbo Diosta jiapsä bénasi.

<sup>7</sup>Të síme ayukamta lútinakeu abe yuuma; fá béchíbem suamsi emo nüye, éntokem Diostau buanaka jíapsa. <sup>8</sup>Símeta béppa nánanchem tüisi emo nákke, bueituk jü emo nákhume juebena Dios bejri yáarim tuchanake. <sup>9</sup>Nánanchem emo mamabeta kaa jájana jíaka. <sup>10</sup>Huëpulaka bem huéeläpo bem miiki senukuu ä buíjnake, Diosta buéresi tühua al-leaka näikim buísemta bénasi éaka. <sup>11</sup>Seenu nokätek tua juka Diosta noki huëpo áman noknake; senu tékiata máktukätek Diosta úttiärata ä mikäpo áman ä boojorianake, juka Diosta tua yörinä béchíbo Jesucristota béchíbo, hua lóoriata átteakame éntok juka nésayhuamta jíbapo béchíbo éntok jíbapo béchíbo. Júneltunake.

***Cristota béchíbo jiokot máchira ínnëhuame***

<sup>12</sup>Eme nákhume, katem át guómte hua jiokot máchira enchim ay jiöbilahuamtachi enchimmeu ayukame, huaka kaa jaibu enchim emo ínnë máchilëu enchimmeu huëtiaka; <sup>13</sup>ál-lem al-leepo yúmala Cristota béu jiokot máchiraata enchim bíchá béchíbo, bueituk ä uyjóriahuata yörisi machik yeu machiak

két enchim buéresi al-leenakë béchíbo. <sup>14</sup>Cristota téhuam béchíbo jájana enchimmet nokhuätek, tüisi tühua enchimmet ayka, bueituk hua Diosta Espíritu uyjória áusüli enchimmet ayka. Lútula huëpo bempo ä béj-reka nooka, të enchim béchíbo áapo jíba yöríhua. <sup>15</sup>Eme jábe junne jiokot máchiraata bichätek, éläpo kaa jábeta ä mëlatakä béchíbo, o ä éekbuä béchíbo, o ä juëna yóremtukä béchíbo, o kaita ä júneriäpo áu ä kikkibachä béchíbo. <sup>16</sup>Të seenu Cristota ä súalë béchíbo jiokot máchiraata bichätek kaa áu títuanake, ál-la Diosta úttílnake huári béchíbo.

<sup>17</sup>Bueituk jü taahuari béja yúmala huaka nokta chúpanakeu Jesucristota súalemmet naateka. Itot báchá naatek, ¿jáchisu ámeu chúpanake jáni huame Diosta tü noki kaa súalekammehui? <sup>18</sup>Bueituk jü tü yoreme jiokotampo jínëihua, ¿jáchisu áu huéenake jáni jü juëna yóremtahui, Diostamak kaita huáatiamtahui? <sup>19</sup>Ä junëlituk huame Diosta éäpo jiokot máchiraata bíchame, jita jo árahuekamta, ä noki chúchupamta mámpo bem jíapsi yéchanake, éntokim tühuaata jonake.

***Diosta súaleme suayahuähui***


**5** <sup>1</sup>Huame yoiyöturi enchim násuk yeu púarimmeune jiokot jiaahua, ínapo kët yöturitaka áme béuchi, éntok Cristotau jiokot máchiraata sikamta bíchakame, éntok jü kët uyjória yeu ä machinakepo annakeme, enchimmeune ínel

jaahua: <sup>2</sup>Jume Diosta súaleka enchim násuk anemem suaya, am suaya kaa útteapo, enchim tü jiápsekä béchibo ál-la; kaa huaka béjtua huamta huáatiaka, ál-lem kaitat boobíchaka chíkti enchim jiápsimak ä yáanake. <sup>3</sup>Katem huame enchim suayäu úttiapo sau báare, ál-lem ejemplotam mákka jume Jesucristota súaleme. <sup>4</sup>Huanäi huaka am suayame béppa nésahuemta yeu machiakem huaka coronata ujjorik kaa momoyemta mabetnake.

<sup>5</sup>Alë bénasi, eme jübua yoyötume, jume yoiyöturim mámpo emo jípure. Éntok síme nánancha emo nok jíkkajaka kaa béttek jíapsitem náu jípunake; bueituk:

Dios am béj-reka huéiye,  
jume emo buérialeme,  
éntok kaa emo buérialemmeu  
túhuata johua.

<sup>6</sup>Júnentukem Dios útteakamta mámam bétuk emo jípure, áapörík enchim tóbnoktianakë béchibo



(1ª de Pedro 5:8)

taahuata yúmako. <sup>7</sup>Símeta huaka enchim kóm éáhuem ä mámpo tójja, bueituk áapo enchim suaya.

<sup>8</sup>Suamsem emo nüye, éntokem kaa kótche; bueituk hua enchim béj-ri, jü diablo, leonta omtë bénasi, chíkola huerama, jábeta ä buána keu jariaka. <sup>9</sup>Huákärem béj-reka óusi jápte, jíba bénasi Diosta súaleka, jünéaka jukai junëli huémta huame huate enchim hermanom síme ániat enchim anemmeu ayukähui. <sup>10</sup>Të jü Dios síme tü eäu tápuni, hua ä yü ujjória itom mik báreka itom núnukame Jesucristota béchibo, chúkula kaa jaiki táapo enchim imi ániapo jìokot ansukäpo, áapo enchim tü tátabnake, enchim óusi éetuanake, enchim útteata máknake, éntok kaitat jáchin éaka enchim jíapsituanake. <sup>11</sup>Áapörík béchibotunake jü yörihuame, éntok jü nésayhuame jíbapo béchibo. Júneltunake.

#### *Teboteri chúpëpo huéme*

<sup>12</sup>Silvánotamak, hua tua yúmalasi hermanopo ín jípurëumakne kaa jaiki nokta enchim eu jìojtek, enchim eu nokaka jáchin enchim emo núnake bétana éntok hua én enchim boojoriau tua jü Diosta lútüriatukä bétana nokaka.

<sup>13</sup>Jume Jesucristota súaleme Babiloniapo aneme enchim mák náu yeu púari, éntok Marcos ín üusi, enchim tebottua. <sup>14</sup>Emóem tebotua enchim emo náké béchibo.

Yánti jíapsihuame símem enchim maktunake, síme eme jume Jesucristota mabet-lame. Júneltunake.